

IA 2022 Oqaasertaliussat

Naalackersuisut Siulittaasuut - Suliassaqarfik 10

Kontumut pingaarnermut 10.13.10 Iluanaarutit, aktianik piginneqatigiiffinniit piginneqataassutit tunisinerillu

AI2022-mi kontumut pingaarnermut matumunnga oqaasertaliussaq aammalu nassuiaatit tassunga atasut peerneqarnissaat qinnutigineqarpoq aammalu oqaasertaliussaq manna 2022-mut ilassutitut aningaasaliissutitut inatsisissatut siunnersuummi kontumut pingaarnermut matumunnga ilanngunneqassasoq qinnutigineqarpoq:

” Kontumi pingaarnermi 10.13.10 Iluanaarutit, aktianik piginneqatigiiffinniit piginneqataassutit tunisinerillu, isertitat 181,9 mio. koruuninit annertunerusut aammalu Piffissaq ungasinnerusoq eqqarsaatigalugu aningaasaliissuteqarnissamut aningaasaateqarfimmi kontumi pingaarnermi 80.00.10 Sanaartugassanut Iluarsagassanullu Aningaasaateqarfimmit utertitat, sanaartugassanut atuinikinnerussutitut utertitat, Inatsisartut Aningaasaqarnermut Akileraartarnermullu Ataatsimiititaliaata akuersissuteqarneratigut akiliutiginissaannut Naalackersuisut piginnaatinneqassasut.”

Kontumut pingaarnermut 10.13.10 Iluanaarutit, aktianik piginneqatigiiffinniit piginneqataassutit tunisinerillu, oqaasertaliussamut nassuiaatit

AI2022-mi kontumut pingaarnermut matumunnga oqaasertaliussamut nassuiaatit peerneqassasut qinnutigineqarpoq, aammalu nassuiaatit makkua 2022-mut ilassutitut aningaasaliissutitut inatsisissatut siunnersuummi kontumut pingaarnermut matumunnga ilanngunneqarnissaat qinnutigineqarluni:

” Oqaasertaliussaq naapertorlugu kontumi pingaarnermi 10.13.10 Iluanaarutit, aktianik piginneqatigiiffinniit piginneqataassutit tunisinerillu, isertitat 181,9 mio. koruuninit annertunerusut aammalu kontumi i Piffissaq ungasinnerusoq eqqarsaatigalugu aningaasaliissuteqarnissamut aningaasaateqarfimmi pingaarnermi 80.00.10 Sanaartugassanut Iluarsagassanullu Aningaasaateqarfimmit utertitat, sanaartugassanut atuinikinnerussutitut utertitat, Inatsisartut Aningaasaqarnermut Akileraartarnermullu Ataatsimiititaliaata akuersissuteqarneratigut akiliutiginissaannut Naalackersuisut piginnaatinneqarput. 181,9 mio. koruunit tassaapput kontumi pingaarnermi 10.13.10 Iluanaarutit, aktianik piginneqatigiiffinniit piginneqataassutit tunisinerillu, nalinginnaasumik isertitassat naatsorsuutigineqartut. Taamaalilluni kontumi pingaarnermi immikkut ittumik isertitanik annertunerusunik isertitaqartoqassappat, taakkua Piffissaq ungasinnerusoq eqqarsaatigalugu aningaasaliissuteqarnissamut aningaasaateqarfimmi ilanngunneqarsinnaasutut isigineqarput.

Oqaasertaliussaq, attaveqaasersuutini allanilu ukiuni aggersuni aningaasaqarnikkut attassisinnaalersitsisinnaasuni Namminersorlutik Oqartussat aningaasaliineritut ilaatillugu, isigineqassaaq. Tamanna Piffissaq ungasinnerusoq eqqarsaatigalugu aningaasaliissuteqarnissamut aningaasaateqarfimmut siunertaavoq, takuuk kommunit Namminersorlutillu Oqartussat

missingersuutaat naatsorsuutaallu pillugit Inatsisartut Inatsisaat nr. 26, 28. november 2016-imeersumi § 18, imm. 2. Oqaasertaliussami tassani Piffissaq ungasinnerusoq eqqarsaatigalugu aningaasaliissuteqarnissamut aningaasaateqarfiup pisariaqartunik aningaasassaqaarnissaa qulakkeerneqarpoq.

Aningaasat qaqugukkut Piffissaq ungasinnerusoq eqqarsaatigalugu aningaasaliissuteqarnissamut aningaasaateqarfimmiilissanerannut killiliussaq 11,5 mio.koruuninik qaffanneqarpoq, tassami aningaasat taakkua KNI A/S-imut kiffartuussinissamut isumaqatigiissutip qaffanneqarneranut atorneqassammata.

Oqaasertaliussaq AI 2021-miit iluarsillugu ingerlateqqinneqarpoq.”

Aningaasaqarnermut Akileraartarnermullu Ataatsimiititaliamit akuerineqarpoq ulloq 28-06-2022, suliaq nr. 22-988.

Aningaasaqarnermut, Aatsitassanut, Inatsisit Atuutsinneranut Naligiisitaaanermullu Naalakkersuisoq - Suliassaqarfik 20 – 24

Kontumut pingaarnermut 20.05.45 Akit qaffannginnissaannik iliuseqarnissaq

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Naalakkersuisut Royal Arctic Line A/S ingerlatseqatigiiffiup 2022-mi ukiup sisamararterutaasa naggataani uuliamut tapiissutitut akiliutigittagaasa appartinneqarnissaanik, katillugu 30 mio. kr.-p tungaanut sinaakkuteqarluni, sinneruttullu atunngitsuukkat 2022-mi ukioq naatsorsuusiorfiup naanerani nunatta karsianut utertinneqassasut isumaqatiginninniarfiginissaanut piginnaatinneqassasut.”

Nassuiaatit kontumut pingaarnermut 20.05.45 Akit qaffannginnissaannik iliuseqarnissaq

Tulliuttut kontumi pingaarnermi oqaasertaliussat nassuiaataanut 2022-mut ilassutitut aningaasaliissutissatut siunnersuummi ilannguteqqullugit qinnutigineqarpoq:

“Manna oqaasertaliussami Naalakkersuisut Royal Arctic Line A/S ingerlatseqatigiiffiup 2022-mi qaammatit pingasut kingulliit Kalaallit Nunaannut angallasserit avannamukaartuni uuliamut tapiissutitut akiliutigittagaasa appartinneqarnissaanik isumaqatiginninniarfiginissaanut piginnaatinneqassasut siunnersuutigineqarpoq. Isumaqatigiissummi 2022/2023-mi ukiakkut pissamaasersornermi assartorneqalereersunut aamma akilerneqareersunut, 1. september 2022 sioqqullugu pisarineqareeraluartunut imaluunniit nassinneqareeraluartunut aamma atuutissasoq anguniarneqarpoq. Uuliamut tapiissutitut akiliutigittagaat aningaasat naleerukkiartornerat aamma uuliap akitsoriartornera ilutigalugu qaffakkiartorsimavoq. Aaqqiissuteqarnissap assartuineri katillugit aningaasartuutit appartissavai, pingaarnermik nerisassanik nunatsinnut eqqussuineri, taamaalillunilu taakku akitsoriartorneri annikillissallugit.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit akuerineqarpoq, ulloq 26-09-2022, Suliap normua 22.995.

Kontumut pingaarnermut 20.10.11 Ilanngaaseereerluni erniat

AI2022-mi kontumut pingaarnermut matumunnga oqaasertaliussaq tassungalu atasut nassuiaatit peerneqarnissaat qinnutigineqarpoq aammalu oqaasertaliussaq manna 2022-mut ilassutitut aningaasaliissutitut inatsisissatut siunnersuummi kontumut pingaarnermut matumunnga ilanngunneqassasoq qinnutigineqarpoq:

”Nr.1

Naalakkersuisut Nunatta Karsiani ima tiguisinnaatitaanermut piginnaatinneqarput:

Mittarfeqarfiit 200,00 mio. kr.

Nukissiorfiit 86,70 mio. kr.

Tiguisinnaatitaanermik atuineq ukiumut 3 %-imik ernialersorneqassaaq. Uninngasuutit ukiumut 0 %-imik ernialersorneqassapput. Erniat ullut ingerlasimasut amerlassusiviisa ukiumik ataatsimik ullunut 360-inut avinneqarnerat tunngavigalugu naatsorsorneqassapput. Tigusat imaluunniit uninngasuutit erniaat ullormiit ullormut naatsorsorneqartassapput qaammatit pingasukkaarlugit siumut nalunaarneqartassallutik.”

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Nr. 2

Mittarfeqarfiit nunatta karsianut katillugit 135.000.000 koruuninik akiitsuisa isumakkeerinnissutiginissaannut Naalakkersuisut piginnaatinneqarput”

Kontumut pingaarnermut 20.10.11 Ilanngaaseereerluni erniat, nassuiaatit

AI2022-mi kontumi pingaarnermi matumani oqaasertaliussamut nassuiaatit peerneqassasut qinnutigineqarpoq aammalu nassuiaatit makkua 2022-mut ilassutitut aningaasaliissutitut inatsisissatut siunnersuummi kontumi pingaarnermi matumani ilanngunneqarnissai qinnutigineqarpoq:

“Nr.1

Mittarfeqarfiit Nukissiorfiillu ulluinnarni ingerlanneqarneranni aningaasat tigorianaanaat nikerartarnerat pissutaalluni Nunatta Karsianit tiguisinnaatitaanissaq pisariaqartinneqarpoq, tassami suliffeqarfiit namminersortitat niuernikkut atugassarititaasut malillugit

taarsigassarsisinnaanngimmata. Suliffeqarfinni namminersortitani aningaasat uninngasuutigineqartut ukiumut 0%-imik ernialersorneqartarput.

Ilassutitut aningaasaliissuteqarnermi matumani Nukissiorfiit Nunap Karsiani tiguisinnaatitaanerata 70-iniit 86,7 mio. koruuninut qaffanneqarnissaa qinnutigineqarpoq. Nuup kiisalu Qasigiannugit Aasiaallu pilersorneqarnerannut erngup nukinganik nukissiorfinnik taakkunungalugu atatillugu atortunik sanaartornermut, aningaasalersuinermit ingerlatsinermullu killiliussatut atugassarititaasut pillugit Inatsisartut inatsisaat nr. 22, 1. december 2021-mersup akuerineqarnera, tamatumunnga tunngaviusoq.

Nukissiorfiit siunertamut matuma siuliani allassimasumut, neqeroortitsinerup ingerlanneqareernissaata aammalu sanatitsisumik toqqaareernissap tungaanut, ingerlatassanik arlalinnik ingerlataqassaaq. Tassani pineqarput ASN-imut nassuiaat, ilassutaasunik misissueqqaarnerit kiisalu neqeroortitsinermut najoqqutassanik suliaqarnermut sanatitsisumillu toqqaanermut ikiorteqarneq.

Nukissiorfiit missingersorpaat tamatumunnga aningaasartuutissanik ukiuni 2022 – 2026-mi katillugit 51,1 mio. koruuninik aningaasartaqassasut, taakkunannga 2022-mut aningaasartuutissat 16,7 mio. koruuninik annertussuseqassasut nalilerneqarluni. Aningaasartuutit taakkua Nukissiorfiit maannakkut aningaasaliissutit atorlugit aningaasalersornissaannut periarfissaqanngilaq.

Neqeroortitsinermut misissueqqaarnermullu il.il. matuma siuliani allassimasumut, tiguisinnaatitaanermut eqqarsaatigineqartut ulluinnarni ingerlatsinermi aningaasaatini tigorianaarni nikerartussatut isigineqarsinnaanngitsumut, atorineqartussatut Nukissiorfiit tiguisinnaatitaanerannik annertusititsinissaaq soorunami naapertuutinngilaq. Tassunga atatillugu eqqumaffigeqquneqassaaq piffissami aggersumi suliniutinik allanik ingerlatsiniartoqartussaammat, suliffeqarfiup maannakkut pilersuinermit sanaartugaataannut, annertuumik kinguaattooruteqarfiusutut nalilerneqartunut, Nukissiorfiit ungasissumi aningaasaqarnikkut unammilligassaannik iliuuseqarfigniffiuniartussanik.

Oqaasertaliussaq iluarsisatut ilusilerlugu AI 2021-miit ingerlateqqinneqarpoq.

Aningaasaqarnermut Akileraartarnermullu Ataatsimiititaliamit akuerineqarpoq ulloq 23-03-2022, suliaq nr. 22-975.

Nr. 2

Konto pingaarnermut 20.10.11 Ilanngaassereerluni ernianut oqaasertaliussaq naapertorlugu, Mittarfeqarfiit (MIT Netto) nunatta karsianit 200 mio. koruunit tikillugit atuisinnaatinneqarpoq. Suliffeqarfiit nammineertitat niuerneramik tunngaveqartumik taarsigassarsisinnaannginnerinik tamanna patsiseqarpoq, taamaattumillu akiliisinnaassuseqarnerata nikingasarnera patsisaalluni nunatta karsianit toqqaannartumik atuisinnaanissaa pisariaqarsimalluni.

Mittarfeqarfiit A/S (MIT A/S) pillugu inatsisartut inatsisaanni nr. 19, 21. november 2022-meersumut nassuiaatini 2022-mi ukiakkut ataatsimiinnermi akuersissutigineqartumi allassimavoq, MIT Nettop

nunatta karsianut akiitsui MIT Nettop aktianik piginneqatigiiffingortinneqarnissaa sioqqullugu 0 koruuninut nalikillisinneqassasut naatsorsuutigineqartoq.

Taassumap kingorna MIT A/S aktianik piginneqatigiiffiulluni niuerneramik tunngaveqarluni ingerlatsilerpat, Nunatta Karsianit atuisinnaatitaanissaa naleqqukkunnaassaaq. Taamaattumik MIT Nettop 2022-mi decembarip 31-anit atuisinnaatitaanera atorunnaassaaq, taamaalillunilu 2023-mi Aningaasanut Inatsimmut ilaatinneqarani.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit ukuerineqarpoq ulloq 30-12-2022, suliaq nr. 22-1009.

Kontu pingaarnermut 20.30.01 Aningaasaqarnermut Sulisoqarnermullu, ASA

Oqaasertaliussat tulliuuttut 2022-mut Ilassutitut aningaasaliissutitut inatsisissatut siunnersuummut ilanngunneqarnissaat qinnutigineqarpoq:

”Nr. 4.

Naalakkersuisut manna kontu pingaarnermut 3 mio. kr.-t tungaannut ukioq aningaasaqarfiusoq tulliuuttumi atuinerusumik imaluunniit atuinikinnerusumik nuussinissamat piginnaatinneqassapput.”

Kontu pingaarnermut 20.30.01 Aningaasaqarnermut Sulisoqarnermullu Aqutsisoqarfik, ASA-mut oqaaseqaatit

Oqaasertaliussat tulliuuttut 2022-mut Ilassutitut aningaasaliissutitut inatsisissatut siunnersuummut ilanngunneqarnissaat qinnutigineqarpoq:

”Nr. 4.

Oqaasertaliussat Naalakkersuisut aningaasaliissutit atorluarneqarnissaat qularnaarniarlugu ukioq aningaasaqarfiusut akornanni aningaasanik nuussinnaanissaannut piginnaatissavai.

Oqaasertaliussat nutaajupput.”

Aningaasaqarnermut Akileraartarnermullu Ataatsimiititaliamit ulloq 27-05-2022, suliaq normumi 22-980 akuerineqarpoq.

Suliassaqarfik 34

Kontumut pingaarnermut, 34.12.01 Nunap immikkoortuini peqqinnissaqarfiit

Tulliuuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Naalakkersuisut 2022-mi suliassaqarfimmi 34-mi kontuni pingaarnerni ataatsimut atuinikinnerusoqassappat 2023-mi kontumut pingaarnermut, 34.12.01 Nunap immikkoortuini peqqinnissaqarfiit, 3,5 mio kr.-ninik nuussinnaanermut Naalakkersuisut piginnaatinneqarput.”

Kontumut pingaarnermut, 34.12.01 Nunap immikkoortuini peqqinnissaqarfiit, nassuiaatit

Tulliuttut kontumi pingaarnermi oqaasertaliussat nassuiaataanut 2022-mut ilassutitut aningaasaliissutissatut siunnersuummi ilannguteqqullugit qinnutigineqarpoq:

“2022-mi suliassaqarfimmi 34-mi aningaasaliissutini atuinikinnerunerit piviusunnngortinneqassappata Naalakkersuisut kontumut pingaarnermut, 34.12.01 Nunap immikkoortuini peqqinnissaqarfiit, 2023-mi 3,5 mio. kr.-nirik nuussinissamat oqaasertaliussatigut piginnaatinneqarput.

2023-mut Aningaasanut Inatsit pillugu Isumaqatigiissutip kinguneratut 2022-mut Ilassutissatut aningaasaliissutit pillugit Inatsimmi oqaasertaliussat aammalu 2022-mi peqqinnissaqarfimmut tassanngaannartumik aningaasaliissuteqarnissaq pillugu angniarneqartutut oqaatigineqartut ilaatinneqassapput.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit akuerineqarpoq ulloq 29-12-2022, suliaq nr. 22-1007.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

Suliassaqarfik 40

Konto pingaarnermut 40.92.20 Sulisartut Højskoliannut tapiissutit

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Sulisartut Højskoliannut illut qularnaveeqqutigalugit Namminersorlutik Oqartussanit taarsigassarsiaasa katillugit 4.969.300 kr.-it isumakkeerutiginnissaannut Naalakkersuisut piginnaatinneqarput.”

Kontumut pingaarnermut 40.92.20 Sulisartut Højskoliannut tapiissutininut nassuiaatit

Tulliuttut kontumi pingaarnermi oqaasertaliussat nassuiaataanut 2022-mut ilassutitut aningaasaliissutissatut siunnersuummi ilannguteqqullugit qinnutigineqarpoq:

“Sulisartut Højskoliata siulersuisui tamanna tunuliaqutaralugu Namminersorlutik Oqartussanut akiitsut isumakkeerutiginnissaannut periarfissamat, akiliisinnaannginnermut matussutissanik tapiissutininut kiisalu atuarfiup atuartunut ineqarfiutaasa atuarfiullu illuutaasa isaternerqariaannaat isaternerissaannut tapiissutininut tunngasunik Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfimmut saaffiginnipput.

Akiitsunik isumakkeerinninnermut naleqqiullugu aalajangersimasumik pineqarput Sulisartut Højskoliata illut qularnaveeqqutigalugit taarsigassarsiaata Namminersorlutik Oqartussanit isumakkeerutigineqarnissaat. Akiitsut ulloq 1. Maj 2022--mi katillugit 4.969.300 kr.-inik annertussuseqarput. Atuarfik aningaasaqarnermut ukiup matuma aallartinnerani taarsigassarsiami

erniat akilinngisat katillugit 900.000 kr.-it missaaniittut akilersorsimavai. Illut qularnaveeqqutigalugit taarsigassarsiat isumakkeerutiginerisigut ukiuni aggersuni ukiumut 200.000 kr.-it missaannik ernianut atuarfik aningaasartuuteqarunnaassaaq.

Akiitsunik isumakkeerinninnerup kingunerisaanik kontumi pingaarnermi 20.10.11 Ilanngaasereerluni ernianik aningaasaliissutit 200.000 kr.-inik appartinneqarput. Tassunga atatillugu nutaaq kontu ilanngunneqarpoq kontumi pingaarnermi 40.92.20 Sulisartut Højskoliannut tapiissutit 2022-mi 4.925.000 kr.-inik qaffanneqarlutik.

Sulisartut Højskoliat aningaasaqarnikkut ajornartorsiorpoq, atuarfiup suli ineriartortinnissaanut siunissamilu inuusuttunut tulluarnissaanut naleqqiullugu malunnartunik unammillernartuusut. Maannakkut pissutsit kingunerisaannik atuarfiup ukiup naanissaanut ingerlatsinini nangissinnaanngilaa. Tassunga ilanngutissaaq atuarfiup atuartunut ineqarfiutaasa annertunerusumik iluarsaannissaannik pisariaqartitsineq.

Ukiup naanissaanut ingerlatsinerup atuarfiup ingerlatiinnarnissaa qulakkeerniarlugu aamma 2023-miit atuartunik nutaanik tigusinissaanut aningaasaqarnikkut ikiuunnissaaq pisariaqarpoq.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit akuerineqarpoq ulloq 15-08-2022, suliaq nr. 22-991.

Aalisarnermut Piniarnermullu Naalakkersuisoq

Ingerlatsivik 51

Kotomut pingaarnermut 51.01.07 aalisartunut piniartunullu siunnersuisoqarfik

Tulliuttumi oqaasertaliussaq kotomut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Aalisarnermut Piniarnermullu Naalakkersuisoq aalisartunut piniartunullu siunnersuisoqarfik pillugu KNAPK-mut piffissamat 1. januarimiit 30. juni 2023-p tungaanut isumaqatigiissusiornissamat piginnaatinneqarpoq.”

Kotomut pingaarnermut 51.01.07 aalisartunut piniartunullu siunnersuisoqarfik

Tulliuttut kontumi pingaarnermi oqaasertaliussat nassuiaataanut 2022-mut ilassutitut aningaasaliissutissatut siunnersuummi ilannguteqqullugit qinnutigineqarpoq:

“Oqaasertaliussakkut suliassap tamanut suliariumannittussarsiuunneqarnerani siunnersuisoqarfiup ingerlaannarnissaa qulakkeerneqarpoq kiisalu siunnersuisoqarfiup maannakkut siunnersortai marluk suliunnaarnissaanik nalunaarfigineqarnissaannut malittarisassat atuutitineqassallutik. Ilimagineqarpoq KNAPK-mut isumaqatigiissut 2022-mi atugassaritineqartut assingi atorlugit qaammagini arfinilinni ingerlaannassasoq. Suliamut akiliut kotomut pingaarnermut matumunnga aningaasaliissutit tamarmiusut annerpaamik 1/2-eraat.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit akuerineqarpoq ulloq 20-12-2022, suliap normua 22-1012.

Aatsitassanut Inatsisillu Atuutsinneqarnerannut Naalakkersuisoq - Suliassaqarfik 66-67

Kontumut pingaarnermut 67.01.13 Sulianik ingerlatitsinermut aningaasaliissutit, aatsitassanut suliassaqarfimmi eqqartuussivinni suliassat

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Kontup pingaarnep 67.01.13 Sulianik ingerlatitsinermut aningaasaliissutit, aatsitassanut suliassaqarfimmi eqqartuussivinni suliassat, ataani aatsitassanut suliassaqarfimmi aalajangiinernut, suliassanik suliarinninnermut il.il. aaqqiagiinngissuteqarnermut atatillugu eqqartuussivinni suliassanut aningaasartuutit tamarmik (aammalu aningaasartuutit avinneqartut), kiisalu suliassap eqqartuussivinnut kiisalu isumaqatigiissitsiniarnernut suliassanut suliakkiunneqarnissaa sioqqullugu eqqartuussissuserisumut il.il. aningaasartuutit, akilerneqassapput. Kontumi pingaarnermut aningaasaliissutit apeqqutaatinnagit eqqartuussivimmi suliassanut ataasiakkaanut tamaginnut 2.500.000 koruunit tikillugit aningaasassanik atugassanngortitsisoqarsinnaavoq. 2.500.000 koruunit sinnerlugit aningaasartallit, atugassiinnginnermi Aningaasaqarnermut Akileraartarnermullu Ataatsimiititaliamut saqqummiunneqassapput.”

Kontumut pingaarnermut 67.01.13 Sulianik ingerlatitsinermut aningaasaliissutit, aatsitassanut suliassaqarfimmi eqqartuussivinni suliassat, nassuiaatit

Tulliuttut kontumi pingaarnermi oqaasertaliussat nassuiaataanut 2022-mut ilassutitut aningaasaliissutissatut siunnersuummi ilannguteqqullugit qinnutigineqarpoq:

“Aatsitassanut suliassaqarfimmi inatsisinik suliqaarnissaq, kiisalu Kalaallit Nunaanni aatsitassanik misissueqaarnissamut, aatsitassarsiorluni misissuinissamut piiaanissamullu atatillugu akuersissutinik il.il. tunniussinissaq, Aatsitassanut Inatsisillu Atuutsinneqarnerannut Naalakkersuisoqarfiup ilaatigut akisussaaffigaa, takuuk aatsitassat pillugit ingerlatallu tamatumunnga pingaarutillit pillugit inatsisartut inatsisaat nr. 7, 7. december 2009-imeersoq, tamatuma kingorna allangortinneqartartoq nalunaarutillu (Aatsitassanut ikummatissanullu inatsit). Sulianik ingerlatitsinermut aningaasartuutit il.il., aaqqiagiinngissuteqarnerit aatsitassanut ikummatissanullu inatsit inatsisillu allat attuumassuteqartut naapertorlugit aatsitassanut suliassaqarfimmi aalajangiinernut, suliassanik suliarinninnermut il.il. atatillugu pilersinnaasut, malitsigisaannik eqqartuussivinni isumaqatigiissitsiniarnernilu suliassanut atatillugu pilersinnaasut, aningaasalersorneqarnissaat qulakkeerniarlugu, kontu pingaarnep manna pilersinneqarpoq.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit akuerineqarpoq ulloq 16-12-2022, suliap normua 22-997.

Nunalerinermut, Imminut Pilersornermut, Nukissiutitut Avatangiisinullu Naalakkersuisoq – Suliassaqarfik 73-77

Siunertanut kontumut 73.04 Nunalerineq Imminut pilersorneq

AI2022-mi siunertanut kontumut matumunnga oqaasertaliussap nr. 4-p peerneqarnissaa qinnutigineqarpoq aammalu 2022-mut ilassutitut aningaasaliissutitut inatsisissatut siunnersuummi siunertanut kontumut matumunnga oqaasertaliussap matuma ilanngunneqarnissaa qinnuteqaatigineqarluni:

”Nr. 4.

Naalakkersuisut atugassarititaasut matuma kinguliani allassimasut tunngavigalugit 5 millioner koruunit angullugit ataatsimut katillugu aningaasartalimmik nunaatillit taarsigassarsiaannut qularnaveeqqusiinissamut piginnaatinneqarput:

- Aningaaserivimmi, sparekassimi Nunat Avannarliit Killiit Aningaasaateqarfiani taak-kualuunniit akuleriissillugit taarsigassarsianut qularnaveeqqusiissutitut qularnaveeqqusiisoqarsinnaavoq. Qularnaveeqqusiissutit taarsigassarsiat allat sivisoqataannut, sivisunerpaamik ukiut aappaat avillugu sivisussuseqarsinnaasumut, taarsersugassatut piffissaligaassapput.
- Taarsigassarsiat nioqqtissianut nunalerinermut atugassanut makkununnga aningaasalersuinermit taamaallaat atorpeqarsinnaapput: Nunaatini uumasutitut nerisassat kimittuut, nerukkaatissanik naatitanillu tunisassiornermut naggorissaatit aamma qequt kiisalu karrit siaruartigassat.
- Annerpaamik taarsigassarsiat 100%-iinut qularnaveeqqusiisoqarsinnaavoq. Taarsigassarsiat niuernermit atugassarititaasut tunngavigalugit taarsigassarsiaassapput, taamaattorli ukiup aappaat avillugu taarsersugassatut aammalu 2022-mi atuuffissaat naasussanngorlugu piffissalernerqassapput.
- Taarsigassarsianut qularnaveeqqusiissutit inunnut suliffeqarfinnullu Kalaallit Nunaanni nunaateqarnermik inuussutissarsiorsinnaatitaasunut kiisalu kattuffinnut piffissami taarsigassarsiat tunniunneqarnerisa nalaanni inuit nunaateqarnermik inuussutissarsiorsinnaatitaasut sinnerlugit ingerlatsisunut qularnaveeqqusiissutigineqarsinnaapput.

- Taarsigassarsinissap pinissaata nunalerinermut aamma aningaasaqarnermut tunngasutigut naliliineq malillugu naapertuuttuunissaa, qularnaveeqqusiinissamut piumasaaqaa-taavoq.

Qularnaveeqqusiissuteqarnermi Nunatta Karsiata akiligassai akiitsut sinnerini piffissamut qaqugumulluunniit atuuttumut assinginik amerlassuseqartunut annertussuseqarput, taakku aningaasat qularnaveeqqusiiffigineqartut taarsigassarsiarineqaaqqaartut aningaasartaannik annertussuseqarput, tassami qularnaveeqqusiissuteqarnermi taarsigassarsisumut ernialiissutigineqartut akitsuusiunneqartullu ilaatinneqanngimmata.”

Aningaasaqarnermut Akileraartarnermullu Ataatsimiititaliamit akuerineqarpoq ulloq 29-06-2022, suliap nr. 22-989.

Kontomut pingaarnermut 73.04.01 Nunalerinermi aningaasalersuinissamut tapiissutit.

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Naalakkersuisut nunalerisunut 2022-mi naggorissaatissanut nerukkaatissanullu saniatigut aningaasartuuteqarnermut matussutissatut katillugit 5 mio. koruuninik tapiissuteqarnissamut piginnaatinneqarput. Naalakkersuisut nunalerisunut savaaqqanik nersussuarnillu tunisinermut atatillugu qinnuteqartoqarneratigut aamma nersutinik toqoraaffinniit tunisinermi kisitsisit pisortatigoortut tunngavigalugit nunalerisunut tapiissutinik akiliisinnaapput.”

73.04.01 Nunalerinermi aningaasalersuinissamut tapiissutit-mut nassuiaatit

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Oqaasertaliussami Naalakkersuisut nunalerisunut savaaqqanik nersussuarnillu tunisat amerlassusai tunngavigalugit immikkut ittumik tapiissutinik akiliisinnaaneritut inatsisitigut tunngavissamik qulakkeerinissaq siunertarineqarpoq.

Oqaasertaliussaq nutaajuvoq.”

Aningaasaqarnermut Ataatsimiititaliamit ulloq 20-09-2022 akuerineqartoq., suliap nr. 22-996.

Kontomut pingaarnermut 77.05.08 Avatangiisinut Aningaasaateqarfik

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Nr. 3

Kommunit nuna tamakkerlugu eqqagassalerinermi aaqqiissutissanik pilersitsinissaannut tapiissutitut Avatangiisinut Aningaasaateqarfimmiit 50 mio. koruuninik nuussinissamut Naalakkersuisut

piginnaatinneqarput. Tamatuma kingorna aningaasat ESANI A/S-ip aningaasaataanut akileeqaataassutissatut kommunit atorneqassapput. “

Kontumut pingaarnermut 77.05.08 Avatangiisinut Aningaasaateqarfik nassuiaatit

Tulliuttumi oqaasertaliussaq kontumut pingaarnermut uunga 2022-mut ilassutitut aningaasaliissutissatut siunnersuummi ilanngunneqassasoq qinnutigineqarpoq:

“Nr. 3

Oqaasertaliussami 50 mio. koruunit kommunit nuna tamakkerlugu eqqagassalerinermi aaqqiissutissanik pilersitsinissannut tapiissutitut tunniunneqarnissaat siunertarineqarput, taakkulu tamatuma kingorna ESANI A/S-imi aningaasaatinut aningaasaleeqataassutitut atorneqassapput.

Tamatumani kommunit suliffeqarfinnik pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisaanni nr. 23-mi, 28. november 2018-imeersumi piunasaqaatit naammassineqarnissaat qulakkeerneqassaaq. ESANI A/S ingerlatseqatigiiffittut kommunimit pigineqartutut kommunalbestyrelsimit akuerineqaqqaarani ikuallaavimmik il.il. suliffeqarfiup allamut pisussaaffiunut qularnaveeqqusiissuteqarsinnaanngilaq. ESANI A/S minnerpaamik 25 procentinik, tassungalu akiitsutigut pisussaaffiusinnaasut, qularnaveeqqusiissuteqarnissamut akuersissuteqartoqarnissaanik qinnuteqaammut ilaatinneqartut ilanngullugit akiliisinnaassuseqarpat kommunalbestyrelsi qularnaveeqqusiissuteqarnissamut akuersissuteqarsinnaavoq.

Naalakkersuisut siusinnerusukkut nuna tamakkerlugu eqqagassalerinermi aaqqiissutissap pilersinnissaannut Avatangiisinut Aningaasaateqarfimmiit 50 mio. koruuninik tapersiinissamik ESANI A/S-imut siumoortumik neriorsuteqarput. Aningaasat, ESANI A/S-imut nuna tamakkerlugu eqqagassalerinermi aaqqiissutissanut tapiissutitut akilerneqareersut, kingusinnerusukkut ESANI A/S-ip kommunit aqutugalugit aningaasaatinut akileeqaataassutaasut tigoreerpagit Avatangiisinut Aningaasaateqarfimmut utertinneqassapput. Matumani naatsorsuutit teknikkimut tunngasortai aqutugalugit aaqqiinissaq, ESANI A/S-ip kommunit suliffeqarfinnik pigisaasa sanaartukkanillu pigisaasa ilaasa pisiarinerinut, qularnaveeqqusernerinut attartornerannulluunniit akuersisarneq pillugu Inatsisartut inatsisaanni nr. 23-mi, 28. november 2018-imeersumi piunasaqaatinik naammassinnaalernissaanut qularnaarisussa pineqarpoq.

Taamaalilluni Avatangiisinut Aningaasaateqarfimmiit nuna tamakkerlugu eqqagassalerinermi aaqqiissutissanut tapiissutini 50 mio. koruuniusuni siunertaasoq allanngussanngilaq missingersuutinullu sunnuteqartussaanani.”

Aningaasaqarnermut Akileraartarnermullu Ataatsimiititaliamit akuerineqartoq, ulloq 27-12-2022, suliaq normu 22-1015.